

ORATIONES

DICENDÆ AB EPISCOPO CUM NON IN PONTIFICALIBUS CELEBRAT

Indulgentia centum dierum pro singulis orationibus. Pius Pp. XII, 14 ianuarii 1940. (Concordat cum MR 1962.)

Cum exuitur cappa:

Exue me, Dómine, véterem hóminem cum móribus et áctibus suis: et índue me novum hóminem, qui secúndum Deum creátus est in iustítia, et sanctitáte veritátis.

Cum lavat manus:

Da, Dómine, virtútem mánibus meis ad abstergéndam omnem máculam immúndam; ut sine pollutióne mentis et córporis váleam tibi servíre.

Ad amictum:

Impóne, Dómine, gáleam salútis ad expugnándos diabólicos incúrsus.

Ad albam:

Deálba me, Dómine, et munda cor meum; ut, in Sáanguine Agni dealbátus, gáudiis pérfruar sempitérnis.

Ad cingulum:

Præcínge me, Dómine, cingulo puritátis, et extíngue in lumbis meis humórem libídinis; ut máneat in me virtus continéntiæ et castitátis.

Cum accipit crucem pectoralem:

Muníre dignéris me, Dómine

Iesu Christe, ab ómnibus insídiis inimicórum ómnium, signo sanctíssimæ Crucis tuæ: ac concédere dignéris mihi indígno servo tuo, ut, sicut hanc crucem, Sanctórum tuórum relíquiis refértam, ante pectus meum téneo, sic semper mente retíneam et memóriam passiónis, et sanctórum victórias Mártýrum.

Ad stolam:

Redde mihi, Dómine, óbsecro, stolam immortalitátis, quam pérdidi in prævaricatióne primi paréntis: et, quamvis indígnus accédere præsumo ad tuum sacrum mystérium cum hoc ornamento, præsta, ut in eódem in perpétuum mérear lætári.

Ad planetam:

Dómine, qui dixísti: Iugum meum suáve est, et onus meum leve: præsta, ut illud portáre sic váleam, quod possim cónsequi tuam grátiam.

Ad manipulum:

Mérear, precor, Dómine, manipulum portáre mente flébili; ut cum exsultatióne portiónem accípiam cum iustis.